

溫公文集

第十二冊

司馬溫公文集卷八十

山右督學使吳時亮元亮甫發刻

平陽府知府劉餘祐

平陽府推官白楹

夏縣知縣王彥葵全發刻

十九代孫生員司馬嶧全訂

誌銘三

縉雲縣尉張君墓誌銘

故翰林侍讀學士張公有子曰某前公若干年卒殯

楚州後若干年與公偕蒞襄城時皇祐五年閏月甲申也其第大理寺丞光以治行來求銘光獲事侍讀公爲日久又與君之兄弟遊今也不敢以愚陋辭而不爲姑譔次其所聞納諸壙云君字仲倩其世家鄉黨見於侍讀公之碑君性嗜學年十五志節已皦皦出人有從母娶居將從其女於保德軍子幼不能自致君奮曰人母子單弱如此於以涉遠我獨何心坐視之邪即曰父母請送之父母疑其尚少然聞其言甚說即遣之君冒盛寒往返數千里曾不爲勞人皆

嘆其仁而有立以蔭補太廟齋郎及長調縉雲尉治
有嚴迹縣有淫祠曰五通人嚴事之歲旱君徧禱群
祀不及五通吏民以爲請君不得已強往禱且卜之
巫曰不吉必無雨比歸雨大至君笑曰果然雨不雨
非妖鬼事也而敢屢爲變怪以驚愚民是不可不除
卽部吏卒焚滅其祠梓土偶人投江中歲亦大熟官
滿歸道病或請留傳舍俟愈而行君曰吾官遠方不
獲侍親之左右四年于此矣今幸歸至舍見吾親而
死吾目瞑矣又何可留趣舟而前及楚州卒年二十

八娶袁氏故諫議大夫煒之孫生二男綱試將作監
主簿繼太常寺太祝二女其幼者早夭初侍讀公有
五子光知其三人焉而不及識君三人者皆甚才然
猶自謂不如也侍讀公沒兄弟寓居汝潁間食口衆
無田宅以自給咸泣曰縉雲在吾屬豈憂此乎言其
知力足賴而不遺其親也嗚呼使顯於朝而老所施
設豈若是而已哉銘曰苑彼嘉禾煒煒其華實而未
碩孰披之柯人之明果胡壽不遐思而悲豈伊其家

大理寺丞龐之道墓誌銘

嘉祐八年作

龐之道名元魯故相國頴公之元子妣曰嘉興縣君
邊氏其鄉里世系見於頴公之誌天聖中先君與頴
公皆爲群牧判官居相近光朝夕與之道遊凡事之
之道時尚幼性明穎於文辭不待力學而自能讀書
初如不措意已盡得其精要前輩見之皆驚嘆光年
不相遠自視如土瓦之望珠玉頴公爲廣南東路轉
運使奏之道試秘書省校書郎及爲知雜御史又奏
守將作監主簿景祐五年光與之道同登進士第之
道簪書懷州判官事未幾徙知河南縣事縣多豪貴

家素號難治之道至繩索無所避豪貴爲之歛手徒
簽書河中府判官事後數年光過河南問於野人曰
龐君爲治何如曰明而有斷又問今宰曰不及龐君
遠矣乃知野人最不可欺而論議甚公也頴公爲鄜
延經略安撫使奏之道書機宜文字時方用兵文書
填委或中宵不得寐頴公入爲樞密副使欲奏其勞
爲之求升資之道辭曰將吏有功者願大人悉奏之
元魯不足言也頴公喜而從之乂之以大理寺丞監
國子監書庫慶歷七年五月戊寅以疾終年三十二

殯於薦嚴佛舍之道事繼母劉夫人撫畜諸弟始終
無間言及沒哭之皆哀不自勝終潁公之世親友不
敢語及之道語之潁公未嘗不悲慟始光知之道敏
於爲學及過河南又得其爲政焉其沒也益知之道
孝友之行深矣先娶孫氏故都官員外郎道之女又
娶張氏今吏部侍郎致仕存之女一女早卒遂無子
嘉祐八年六月壬申弟元英遷之道之柩塋於雍丘
潁公之墓側祔以孫氏光爲之銘曰學施於治孝友
兼美官不登朝沒纔壯齒如光何人榮祿及此噫才

固不足言直命而已矣

右班殿直傳君墓誌銘

皇祐五年作

熙寧二年春傳欽之遺光書曰昔我王考材氣過人
宦不遂以沒堯俞幼鞠於王妣以至成人恩隱殊厚
堯俞或以事夜艾未寢王妣常危坐待之及仕而之
四方王妣不見再逾月則憂念氣滿而成癰逮王妣
之亡竭堯俞之淚不足以償癰之血也今將以某月
某日舉吾王考妣之柩塋於濟源吾嘗與子同在諫
省子幸而知我必爲我銘其墓子苟自謂不能是愛

其少頃之勤而使我抱終已之恨非仁人之爲也光
讀之愧且懼復書曰子以義責光光何敢辭然門內
之美光不得聞也子爲光叙其事以來光謹條次之
則可矣有間欽之以其狀來曰君諱某字寶臣其先
大名內黃人世爲富家曾祖考諱思進始讀書爲儒
祖考諱疑贈虞部員外郎考諱世隆以春秋三傳登
科官至駕部員外郎知邛州事始家於鄆君少通尚
書屢舉不中第用親蔭補三班借職累遷至右班殿
直初監澶州酒稅歷齊州離濟寨酒稅廬州巡檢以

事去官後監趙州倉知定州新樂縣復以事去官已而監博州酒稅以疾罷歸明道元年十月十日終於家壽六十一君爲人慷慨方嚴家之子弟雖甚愛之不命坐不敢坐其當官明敏果斷在新樂有西山采木卒二百人謀劫其縣大呼自南門入君率左右操自挺逆之至則叱使坐卒不意君遽出皆愕不敢動君因罵之曰餓兵欲奚爲捽其爲魁者數人杖之各數十而縱之皆抑首去不敢出聲然不能與世浮沉平視貴要若無人故所至齟齬且老益窮因發狂疾

棄官歸卧一歲所忽起召家人與訣語言如平生人
乃疑其非狂也故相國王沂公爲諸生家居未與人
接君卽以公輔噐之已而果然人不知其何用知之
也夫人霍氏國子博士致仕若拙之孫篤於孝慈其
父亡夫人未之知獨視雲烟草木皆慘悽變色泣下
不能自止逾月而訃至後君二十二年年八十一而
終男某仕至山南東道節度推官知磁州昭德縣事
贈工部郎中二女其長者蚤世幼適楊氏孫七人長
曰堯俞字欽之今爲兵部員外郎次舜俞郊社齋郎

次君俞未仕餘皆蚤世欽之爲諫官處大議正直無
所顧避朝廷不能用其言除知雜御史欽之固辭不
肯拜必求得罪乃去知和州嚴振天下嗚呼得非承
其祖之風烈邪欽之以夫人嘗至濟源愛其土風遂
塋焉銘曰氣直志剛難進易傷善抑不揚其後必昌
皆理之常

府州判官杜君墓誌銘

嘉祐二年作

嘉祐二年秋光在京師進士杜知臣涕泣來言曰大
人昔以進士得見於先公又與子遊最久今不幸而

沒子爲我銘其墓光旣弔因辭以不文不敢爲知臣
固請曰佗人知臣所不敢請也故惟子之歸光廼曰
然則願聞子先君世系治行之詳知臣退以其狀來
曰君諱陟字從聖其先自成都徙長江曾大父禮大
父鶚皆不仕父昭文遂州長史君少好古學無所不
闕著化坊三十一篇言王者以教化坊民之道慶曆
初天子詔諸州皆立學擇其士之賢有行者爲之師
州人共推上君君屢舉進士有司失之卒以三禮卒
謁選熈道尉考滿遷府州軍事判官力於吏治轉運

使提點刑獄交章薦會屬官有以姦贓敗者怨恨反
誣訟君坐罷官去君詣闕欲自理未果遇疾以八月
己巳終於里舍年五十有七娶譚氏生三子男知臣
女長適卞宗建幼適姚申皆舉進士嗚呼杜君觀其
所學與所爲書其志豈欲如是而止哉卒無遇以窮
斯可哀矣知臣負其喪歸以其年月日塋某地銘曰
學之也勤守之也專仕進迫邇又不永年嗚呼孰知
其然必歸之天

贈太常博士吳君墓誌銘

嘉祐五年作

君之先世家金鄉曾大父諱賁不仕大父諱豫贈太常丞始塋洛陽金谷鄉之尹里父諱菁太平興國中進士高第以公直材敏立名朝廷數迁權貴由是不得居中連典太州官至侍御史亦塋尹里尹諱元亨字子正用御史遺奏補太廟齋郎遷許州司士叅軍選授永康尉歷河中府法曹叅軍馮翊令馮翊華陰以潦沮爲境中間洲上有美田民相與爭之五十餘年吏不能決君檄華陰令會境上書案兩鄉之籍徧履其田執度以度之皆得其實自是民不敢復爭時

人侮之君爲人謹廉專以誠長者處官不能飾智巧
以媚上故官久不遂官滿集吏部選除鄰水令還未
至家道疾祇知洛陽縣李宋卿延之縣舍以天聖九
年八月某日終年四十一宋卿主辦其喪殯於永安
佛室夫人聶氏秘閣校理震之女後君五年長男顯
先夫人二年皆不祿獨少男幾復年未冠及幼女一
人相與居家無一金之產幾復於孤貧中能自刻意
爲學取進士第今爲太常博士知蓬州事累贈君官
至太常博士夫人封仙源縣太君嫁其妹於比陽令